

清·方略館 編

清代 方略 全書

北京圖書館出版社



清代方略全書

一八一

清·方略館編

北京圖書館出版社

清·奕訢等撰

欽定平定陝甘新疆回匪方略

卷一三八——一四一

清光緒二十二年（一八九六）鉛印本

欽定平定陝甘新疆回匪方略卷一百二十八 丙寅年

二月初九日

己亥



上命軍機大臣傳諭明誼麟興車林敦多布廣鳳奎昌
閻敬銘吳昌壽丁寶楨王榕吉曰新疆回匪變亂以
來西路各城聞風四起到處蔓延伊犁被困岌岌可
危設該匪乘勢竄突則北路極形喫重塔爾巴哈台
及烏科兩城所設額兵軍火不齊操防久已廢弛又

兼糧餉缺乏殊難枵腹荷戈前經戶部奏催同治五年分新疆南北兩路經費當經降旨令山西山東河南等省照數撥解現在北路防務喫緊待用孔殷著閻敬銘吳昌壽王榕吉丁寶楨懍遵前旨迅速籌解不得稍事遲延現在明緒因事機緊迫請調烏里雅蘇台蒙古官兵六千員名一應軍火尤須早爲籌備山西距該城較近著王榕吉趕辦火槍戰箭並一切

火藥鉛丸等件運交綏遠城由綏遠城從北路草地
解至烏里雅蘇台交明誼等接收撥給蒙古官兵迅
速起程赴援伊犁烏里雅蘇台爲北路咽喉明誼等
身膺專城責任綦重科布多塔爾巴哈台均係北路
扼要之區需餉均甚緊要一俟餉銀陸續解到卽由
明誼等酌定數目分給各城一面知照該大臣等迅
速迎提應用該大臣等務各督飭兵丁日夜訓練俾

成勁旅以備緩急儻泄沓不知振作致兵丁仍前疲
弱貽誤事機必將該將軍大臣等重治其罪懍之

同日廣鳳奎昌奏言欽奉

諭旨烏梁海臺站趕緊安設並將餉銀等項迅解塔城
查科布多原設臺站至今並未裁撤烏里雅蘇
台解到塔城餉銀因回匪變亂哈薩克助回爲
逆若遽令由科起解經過哈薩克境恐有疏虞

是以暫存科布多前奉

諭旨將此項餉銀迅速派兵護送可否仍俟武隆額派

員前來迎提抑或派員護送恭候

訓示遵行武隆額咨調戰箭鉛丸實因科城原存軍火

無幾僅敷操演之用無從撥給其借撥小麥五

千石實因購運維艱未經撥解今奉

諭旨自應欽遵辦理惟駝運必須用駝五千餘隻儻各

臺無力供應必致辦理掣肘擬先知照前途各
臺之專管將軍大臣等豫將此項駝隻籌備俟
稍有端倪臣等卽趕緊派員前赴歸化城一帶
設法採買不致臨期有誤奏入得

旨知道了所需駝隻著卽知照前途各臺專管將軍大
臣等如數籌備一面趕緊派員採買麥石無誤要需
嗣後伊塔等城餉銀運解到科仍著設法源源解濟

毋稍遲緩

十三日癸卯穆圖善奏言查甘省自甯夏淪陷後

賊勢猖獗臣與都興阿帶兵渡河賊匪負嵎抗拒迨官軍屢次獲勝大加斬馘該回始畏威乞降又因上年十二月甯郡回衆獻城經都興阿帶兵入城焚殺回民慘遭屠戮無不心懷疑懼難保不猜忌反覆以致辦理掣肘現在納中聞

回民仍復具稟投誠靈州金積堡回目馬化澂
亦曾兩次具稟求撫雖真僞難知但未便絕其
自新之路致令回民間風側足再釀巨患刻下
甯郡回衆雖已就撫事局尙未大定所有後路
花馬池一帶毗連陝境仍須加意嚴防並探聞
蘭州省城因陝回大股竄至秦王川水北河一
帶肆行焚掠以致人心驚惶肅州踞匪官軍進

勦失利河狄西甯勦撫尙無定局平固鹽茶自

雷正綰營勇潰散後賊勢益形猖獗臣愚以爲

甘省軍務宜先甯靈而後河狄甘涼肅等處先

內地而後新疆各城果甯靈早就救安則山陝

百貨疏通糧運無阻然後移師遡進專力河西

勦撫兼施不難傳檄而定雷正綰一軍現奉

諭旨令其來甯助勦查甯郡現已收復臣所部兵勇就

近鎮撫已足以備不虞而陝回大股擾近省城
且恐分竄甘涼等處與肅州賊匪勾結亟須撥
兵追剿應請

飭下楊岳斌商令雷正綰將近省陝回節節掃蕩毋任

竄越並請

旨責成成祿一軍迅速前進剿辦肅州踞匪俟肅城克
復再行統兵出關責成曹克忠一軍趕緊剿辦

鞏昌等處股匪俟省南安堵如常再移師平固
一帶與涇州各營犄角夾擊庶無延誤奏入

上命軍機大臣傳諭穆圖善楊岳斌曰納中閫回民具
稟投誠靈州金積堡回目馬化澂亦曾兩次具稟求
撫真僞尙未可定卽著穆圖善懷遵疊次諭旨妥爲
籌辦務令將首要各犯設法縛獻方准投誠斷不可
專意主撫致爲奸回所紿現在甯靈尙未大定甘肅

近省之秦王川水北河一帶肅甘涼等州郡均有匪蹤肆擾該將軍所稱甘省軍務宜先甯靈而後河狄先內地而後新疆自係一定辦法穆圖善務當將甯夏善後事宜妥爲辦理並將靈州回匪迅速辦竣再圖移師進剿雷正綰前經諭令馳赴甯夏軍營茲據穆圖善奏稱甯郡各部兵勇已足鎮撫請飭雷正綰剿辦甘肅近省回匪免致勾結爲患等語卽著穆圖

善與楊岳斌體察情形斟酌辦理新疆需兵緊要成
祿一軍著楊岳斌仍遵前旨催令出關穆圖善奏責
成曹克忠勦辦鞏昌股匪俟省南安堵再行移師平
固一節現在鞏昌業已解圍著咨商楊岳斌妥籌調
派楊岳斌現已出省赴涇務當督飭各軍將各路回
氛次第掃蕩以期肅清關內毋稍延緩都興阿辦理
甯夏軍務勦撫兩歧前已降旨將該將軍交部議處

諭令都興阿將馬隊四營仍留甯夏並將杜嘎爾開
缺諭令隨同都興阿前赴奉天甯夏副都統已著金
順補授卽著穆圖善將馬隊四營妥爲調派甯夏一
切事宜俟金順到任後會商妥辦

十四日
甲辰

上命軍機大臣傳諭明緒明誼曰前據明緒奏伊犁軍
務危急請派員帶兵會剿暨調撥蒙古馬匹已諭令